

29. September 2017

UKA 2017/100

**Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat nr xx ulloq
xx.xxx 2017-imeersoq.**

(Ilinniartitaanermut, kultureqarnermut, ilisimatusarnermut ilageeqarnermullu Naalakkersuisoq)

Ilinniartitaanermut, kultureqarnermut, ilisimatusarnermut ilageeqarnermullu Naalakkersuisup Atuarfik pillugu Inatsisartut inatsisaata allanngortinneqarnissaa pillugu saqqummiussaanut qujalluta Siumumiit imaattumik oqaaseqassaagut.

Nuannaarutigaarput inatsit naleqqussaaviginiarneqartoq pillugu susassaqartut peqataatinneqarsimammata, pingaaruteqartumillu utaqqissunneqartariaqanngitsumik naleqqussaaniartoqarnera pissusissamisoormat iluarsaaqqinnissamut kinguarsarneqartariaqanngitsunik. Ilisimatuussutsikkut naqissuserneqartuarpoq ilikkalertortarneq inuunitsinnut pisut qaninnerpaat ilikkagassatigut pingartinneqarlutik pitsasumik tunngavissinneqarsimagaangata. Soorlu aamma takornartat oqaasiinik ilikkalertortarneq tunngavissagissaarnerpaasartoq oqaaseqqaat pitsasumik ilinniartitsissutigineqarsimappata.

Kinaassutsimik ilisimaarinninneq, ataatsimoorussamillu inuiaqatigiittut nukittuumik kinaassuseqarneq inuiaat tulluussimaarutissaqarnerannik sulissutiginninnermiippoq meeraanermit ineriartortitassaq pingaarutilik. Ullumikkut ilinniarfinnut ingerlariaqqiffiusunut ikaarsaarnermi annertuumik oqaluttuarisaanerup tungaatsigut ingerlatitseqqittarnerput sannngiifeqartoq nukittorsartariaqartorlu takussutissaqarpoq, taamaammallu pissusissamisoorpoq kinguarsaaqqinnagu oqaluttuarisaanermik ilinniartitsinerup inuiaqatigiilerinermit avissaartinnegarluni pinngitsoorani atuartitsissutigineqartussatut inissinneqarnissaa, taamaaliornikkullu qulequttat atuartitsinermi pingaaruteqartut immikkut nukittorsarneqarsinnaaqqullugit.



SIUMUT
INATSISARTUT

Aapaattut nuannaarutigaarpuit atuartitsissutit assassornermik aallaaveqartut, ukiunilu kingullerni maqaasineqarlutik ujartuiffigineqaqisut maanna nukitorsarneqaqqinnialermata. Meeqqat atuarfiinut sineriassuatsinni sumiikkaluartunut tamanut kaammattuinnarsinnaavagut inuusaatsiminnut naleqqunnerpaamik tulluussimaarutigisassaminnillu inerisaaqqullugit. Nunaqqaterpassuaqarpugut aamma utoqqalillutik suliunnaareeraluarlutik suli tunniussassaqangaartunik meeqqallu ineriarngerann annertuumik inuusaatsikkut anersaakkullu nukitorsaaqataasinaasunik naleqartitanillu ingerlatitseqqissinnaasunik. Amerlaqaat meeqqat utoqqartaqarluarlutik ineriarternissaminnik periarfissaqanngitsunik maqaasinnittunillu, soorlu aamma utoqqartavut atorfissaqartinneqarnerminnik isaassivigineqarnissartik nukitorsaatigingaassagaat. Sunaluunniit tamarmi isumaqarnerungaartarpooq utoqqartavut peqatigalugit aaqqissuineq ingerlanneqarsimagaangat.

Pingajuattut nuannaarutissaavoq ukiumik atuartitsiviusumik naammaginartumik angusaqarsimanngikkaanni uteqqiisinnaaneq periarfissiuunneqarniarmat, kiisalu taamaaqataanik ukiumik alluisinnaaneq aqqutissiuunneqarniarluni.

Inuaqatigiit sumiginnaaneraat meeqqat taamak amerlatigisut ingerlariaqqinnissamut periarfissaqaratik meeqqat atuarfiannit anisarnerat, kinguaariit peqqissumik ingerlariaqqissappata tigussaasumik iliuuseqartoqartariaqarpoq, soorlu aamma taamaattoq atuagarsornikkut piginnaasaqarluartut utaqqisinneqartarmata. Meeqqat atuarfiat tamanut ajugaanermik misigiffiussappat tamanut assigiimmik pinninniarneq ajoraluartumik sumiginnaanermik annertuumik imaqarpoq, taamaappoq meeqqat tamarmik assigiinngitsummata assigiinngitsunillu piginnaasaqarlutik.

Immaqa aamma piffissangorpoq maani Inatsisartuni ilaasortat amerlanerusut qulequttami matumanি ersarissumik isummersueqataanissaat.

Aalisagaq imigassarluunniit oqallisigineqarpat inersuaq manna ulikkaartarmat isummersueqataarusuttunik. Neriuppunga aamma meerartatta oqaluuserinerani isummersorluartoqassasoq.

Taamak oqaaseqarlunga Inatsisissatut siunnersuut Ilinniartitaanermut, kultureqarnermut, ilisimatusarnermut ilageeqarnermullu ataatsimiitsitaliamut ingerlateqqinneqarnissaa innersuussutigaara.

Vivian Motzfeldt

Siumut





SIUMUT
INATSISARTUT